

A Piaghe

Piaghe! ses sa perla 'e Logudoro
pro ambiente clima e panorama.
Sos fijos tuos pro su cantu issoro,
han in s'Isula tota 'ogadu fama.

Da poetas chi vènero e ch'ignoro
in dogno tempus ses fecunda mama
e de feminas bellas ch'in su coro
azzenden de amore una fiamma.

Feminas, chi che deus in persona,
ti rezzin cun su visu sorridente
senza ti ponner in suggezione.

Forsi ti tenzo sempr'in coro e mente
pro una mia antiga passione...
Ma... Piaghe, piaghes veramente!

(Ploaghe)

Isrittore in limba

A mie faghen piaghere meda
sos ch'iscrien in sardu in su giornale,
ma m'indisponen si l'iscrien male
ispazzende su najlon pro seda.

Finzas calchi docente liceale
chi de limbista possedit s'ischeda,
ispazzat "sardu" che falza moneda
chi hat pretesas de cursu legale.

Rido chi zertos ch'iscrien in sardu
de sa Sardigna mancu han su fiagu,
ca si sun ischidados troppu tardu.

Perdonen nessi su "risu sardonicu"
sos chi de "sardu" nde mastigan pagu
e iscrien in sardu macheronicu.

Molestias sexuales

Oe finz'in materia de sessu
intran in lite maridu e muzere:
su chi fit prima dirittu-dovere
a boltas como passat pro ezzessu.

Unu chi a s'isposa s'est cunzessu,
cretende de li fagher piaghere,
podet perder de issa ogni podere
finende, pro pius, sutta prozessu.

Duncas, pro evitare su pretore,
mezus chi siat prima istabilida
finzas sa funzione sessuale.

In su euntrami matrimoniale
prezisen cantas boltas a sa chida
han cuncordadu de facher s'amore.

Nuraghe o Muraghe?

In su limbazu de sa ìdda mia
chi, pro chie non l'ischit, est Piaghe,
e forsi est custa s'esatta fonia.

Ma si est gai, s'etimologia
naschet da-e runina o ruinaghe;
comente da-e furru'enit furrage
e da' umbra s'umbrage hat sa nadia.

Cumprando ch'est a ponner una mina
a sa tesi de calchi iscenziadu
chi affirmat ch'est nur sa in raighina.

Su nomen de runaghe bi l'han dadu
cuddos chi l'hana connotu in ruina,
non sos antigos chi l'han fraigadu.

Sa bella eremitana

In sa notte profumada
de sa dulce primavera,
o Maria, in cantonera
ti fato sa serenada.

Cun sa chiterra a disora,
cand'est su tempus amenu,
passadu s'ultimu trenu
torro a ti cantare ancora
a inue as sa dimora
tue bella ememitana.
Acceradi a sa ventana
s'ancora m'as simpatia,
cand'enzo a sa ferrovia
in sa notte profumada.

Pro ti narrer chi t'adoro
forsi bat menzus cosa
de sa cantone amorosa
chi m'est naschida in su coro,
e che novellu Lindoro
la canto paschende s'ama,
pro isfogare sa brama
ch'at in sinu dogni amante,
ch'intendo pius costante
in sa dulce primavera.....

Sa mandronia

Settee sunu sos viscios capitales
e-i su settimu est sa mandronia.
Non lu cundannat sa cheja ebbia,
ma lottu sos livellos sociales.

Su mandrone lamentat tantos males
senza tenner peruna malattia,
e pro cuss'est sughettu a s'ironia
in radio in tivù e in giornales.

Naran chi est istadu unu mandrone
a regalare su piccu a Kossiga
pro haer una bona pensione.

Su mandrone est sempre 'e mala 'udda,
finz'a fagher s'amore l'est fadiga.
Faghet de totu pro non fagher nuda.

Sos sindigos

Fagher su sindigu oe, cun perizia,
no est ingarrigu 'e leare a giogu,
ca l'abbaidan totu che piogu,
e sempre in su mirimi 'e sa giustizia.

Rispondet de s'abusu 'e s'edilizia,
de sas alluviones, de su fogu.
Chircat e no agatat mancu logu
inue isgarrigare s'immondizia.

B'hat sindigos chi faghen su dovere,
pensan a totu e sun sempr'in guai,
ismemighende fizes e muzere.

E b'est chie s'impipat de sa zente,
lassat cantare e no isbagliat mai,
promittit solu e non faghet niente.